

# Umimmaat illersugaanerat piniagaanerallu pillugit Namminersorlutik Oqartussat nalunaarutaat

Pinngortitamik illersuineq pillugu Inatsisartut inatsisaanni nr. 29-imi, 18. december 2003-meersumi § 5, imm. 1, nr. 1-5-mut aamma § 60, imm. 2-mi, Piniarneq pillugu Siunnersuisoqatigiit tusarniareerlugit, Piniarneq aallaaniarnerlu pillugit Inatsisartut Inatsisaanni nr. 12-mi, 29. oktober 1999-imeersumi, § 2, imm. 3-4-mut, § 4, §§-it 7-8, §§-it 11-13 aamma §§-it 16-18-mut, Inatsisartut inatsisaatigut nr. 11-kkut, 12. november 2001-imeersukkut aamma Inatsisartut inatsisaatigut nr. 9-kkut, 15. april 2003-imeersukkut allanngortinneqartumi naapertorlugit kiisalu Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18-imi, 30. oktober 1998-imeersumi § 3, imm. 2, Inatsisartut inatsisaatigut nr. 23-kkut, 22. November 2011-imeersukkut allanngortinneqartumi, naapertorlugit aalajangersarneqarpoq:

## Kapitali 1

### *Atuuffii*

§ 1. Nalunaarut manna Kalaallit Nunaanni umimmaat (*Ovibos moschatus*) illersorneqarnis-saat aamma piniagaanerat pillugu atuuppoq.

## Kapitali 2

### *Eqqissisimatitsineq*

§ 2. Umimmaat nuna tamakkerlugu eqqissisimatitaapput, taamaattoq takukkit § 3 naapertorlugu piniarneqarsinnaaneri pillugit aalajangersakkat taaneqartut.

*Imm. 2.* Akiliuteqarluni aallaaniarneq aalisarnerlu pillugit nalunaarummi akiliisitsilluni umimmanniarnermut piumasaqaatit immikkut malittarisassaqaartitaapput.

## Kapitali 3

### *Pisassiissutit, piffissat piniarfusussat kiisalu piniarfusussat*

### *Pisassiissutininik aalajangersaaneq aamma agguassineq*

§ 3. Uumassusilinnik misissuisunik siunnersuuteqareernerup kingorna Piniarnermut Naalakkersuisoq umimmannik piniarsinnaanermut pisassiissutininik aalajangersaassaaq.

*Imm. 2.* Piniarnermut Naalakkersuisoq nunap ilaanut pisassiissutininik aalajangersakkanik agguassissaaq.

*Imm. 3.* Piniarneq pillugu Siunnersuisoqatigiit aamma Kattuffiit allat suliamut attuumassuteqartut apeqqutini imm. 1-mut 2-mullu tunngassuteqartuni tusarniarneqassapput.

*Imm. 4.* Sumiiffinni umimmannik pisassiissutiniq agguassinermi aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattarpaat.

*Imm. 5.* Kommunimi oqartussat Piniarnermut Naalakkersuisoqarfimmut pisassiissutiniq agguassinermi angusat inerneru pillugit imm. 4 naapertorlugu allakkatigut nalunaaruteqassapput.

#### *Piffissanik piniafiusussanik aalajangersaaneq*

**§ 4.** Uumassusilinnik misissuisunik siunnersuuteqareernerup kingorna Piniarnermut Naalakkersuisoq pisassiissutiniq piniarnissamut aamma akiliuteqatitsilluni umimman-niarnissamut piffissamik aalajangersaassaaq.

*Imm. 2.* Imm. 1-imi piffissat piniafiusussat taamaallaat piffissap 1. augustimip aamma 15. aprilip iluani aalajangersaaffigineqarsinnaapput.

*Imm. 3.* Piniarneq pillugu Siunnersuisoqatigiit aamma Kattuffiit allat suliamut attuumassuteqartut apeqqutini imm. 1-mi aamma 2-mi tunngassuteqartuni tusarniarneqassapput.

*Imm. 4.* Sumiiffinni ataasiakkaani umimmanut piffissanik piniafiusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattarpaat.

*Imm. 5.* Kommunimi oqartussat Piniarnermut Naalakkersuisoqarfimmut piffissat piniafiusussat inerneru pillugit imm. 4 naapertorlugu allakkatigut nalunaaruteqassapput.

#### *Piniafiusussanik aalajangersaaneq*

**§ 5.** Uumassusilinnik misissuisunik siunnersuuteqareernerup kingorna Piniarnermut Naalakkersuisoq sumiiffinnik umimmanniafiusussanik killilersukkamik piniafiusussanik aalajangersassaaq.

*Imm. 2.* Piniarneq pillugu Siunnersuisoqatigiit aamma Kattuffiit allat suliamut tunngassuteqartunut attuumassuteqartut apeqqutit imm. 1-mi pineqartuni tusarniarneqassapput.

*Imm. 3.* Sumiiffinni ataasiakkaani umimmanut sumiiffinnik piniafiusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattarpaat.

*Imm. 4.* Kommunimi oqartussat Piniarnermut Naalakkersuisoqarfimmut sumiiffiit piniafiusussat aalajangersaaneri pillugit imm. 3 naapertorlugu allakkatigut nalunaaruteqassapput.

### **Kapitali 4**

#### *Pisassiissutiniq piniarnermi piumasaqaatit*

**§ 6.** § 8 malillugu inuit akuersissutiniq pisimasut aamma piniarsinnaanermut allagartamik atuuttumik pigisaqartut kisimik umimmanniarsinnaapput.

*Imm. 2.* Akuersissut inummut atiatigut taasamut taamaallaat atuuppoq allanullu tunniunneqaranilu tunineqarsinnaanani.

*Imm. 3.* Akuersissummi takuneqarsinnaavoq, sumi aamma qassinik umimmattoqarsinnaa-nersoq.

*Imm. 4.* Piniarnermut allagartaq 1. maj nallertinnagu akilernerqarsimassaaq, taamaattoq § 25 takuuk.

**§ 7.** Inuussutissarsiutigalugu umimmanniarnermut akuersissummi allanneqarsinnaavoq umimmammik ilivitsumik, ilaanik, amianik, nassuinik il.il. nersutiniq toqoraavimmut imaluunniit tunitsivimmut uumasut nakorsaqaarfianiit akuerineqarsimasumut tunisisoqarsinnaasoq.

*Imm. 2.* Kommunit ataasiakkaat sunngiffimmi aallaaniartartunut "kalaalimineerniarfimmi" tunisineq tuniniaanerlu pillugit aalajangersaassapput.

*Imm. 3. "Kalaalimineerniarfinni" umimmanik tunisineq tuniniaanerlu taamaallaat piffissani piniarfiusuni aamma piffissap piniarfiusup qaangiunneranit amerlanerpaamik ulluni pingasuni atuuppoq.*

## **Kapitali 5**

*Piniakkanik killilersukkanik piniarnissamut akuersissutininik tunniussineq agguaassinerlu*

**§ 8.** Kommunit pineqartut qinnuteqartunut piniarnermut atuuttumik allagartaqartunut aamma sumiiffimmi aqutsiviusumi inuit nalunaarsorsimaffianni najugaqartutut nalunaarsorsima-sunut akuersissutininik tunniussissapput.

*Imm. 2. imm. 1-imi aalajangersagaqaraluartoq, Piniarnermut Naalakkersuisoqarfiup sumiiffimmi aqutsiviusumi najugaqartut aqutsiviusuni allaninut piniarnissaat akuerisinnaava.*

*Imm. 3. Akuersissutininik qinnuteqartut qinnuteqarnerminni 16-inik ukioqalereersimassapput.*

**§ 9.** Akuersissutininik tunniussineq ima pisassaaq, qinnuteqartut ataasiakkaat akuersissutininik sapinngisamik amerlaqatigiinnik pissarsinissaat sumiiffiup aqutsiviusup iluani anguneqartassalluni.

*Imm. 2. Akuersissutinit amerlanerusunik qinnuteqartoqarpat, agguaassineq makitsinikkut ingerlanneqassaaq. Akuersissutininik sinneruttunik agguaaneq aamma makitsinnikkut ingerlanneqassaaq.*

*Imm. 3. Sumiiffinni aqutsiviusuni isorartuuni, piniartumut ataatsimut akuersissutit arlallit tunniunneqarsinnaapput pisat imminnut akilersinnaatinniarlugit.*

*Imm. 4. Makitsinermut atatillugu akuersissutininik agguaassisussaataasup utaqqisut allattorsimaffiat tulleriaarinertalik pilersissavaa, taannalu atuutilissaaq akuersissutininik agguaasseqqinnermi, takuuk § 10, imm. 2.*

*Imm. 5. Innuttaasut kikkulluunniit makitsinerup ingerlanneqarneranut malinnaasinnaatitaassapput. Akuersissutininik agguaassisussaataasup makitsinissaaq, akuersissutinullu tunniunneqartussanut piffissaliussap aamma sumi pinissaa, kingusinnerpaamik sapaatip akunneramik sioqqutsilluni tamanut nalunaarutigissavaa.*

**§ 10.** Akuersissutininik agguaassisussaataasup akuersissutit tunniunneqartut aaneqarnissaannut piffissaliussaaq aalajangissavaa. Inuit akuersissummik tunineqarsimasut akuersissummilli atuisinnaangitsut imaluunniit atuerusunngitsut piaarnerpaamik akuersissut atorneqanngitsoq akuersissutininik agguaassisussaataasumut utertissavaat.

*Imm. 2. Akuersissutit atorneqanngitsoortut utertinneqartullu agguaateqqinneqassapput.*

Umimmanniarnerup uninnissaa sapaatip akunnerinik sisamanik sioqqullugu, akuersissutininik pinissamik utaqqisut tulleriaakkat allattorsimanerat malillugu agguaasseqqinneq piaarnerpaamik aatsaat pisinnaavoq.

## **Kapitali 6**

*Piniariaatsit aamma piniarnermi ileqqorissaarneq*

**§ 11.** Umimmanniarnermi qoorortuut pisissillu atorneqassapput.

*Imm. 2. Qoorortuut pisassiissutininik piniarnissamut atorneqarsinnaatitaasut sullukinnerfaat 6,5 x 55 kaliberiuvoq (aqerlup diameteria 6,5 mm).*

*Imm. 3. Qoorortuut eqittaannartakkat nutsuinnartakkallu umimmanniarnermi atorneqarnissaat inerteqqutaavoq.*

*Imm. 4. Aallaat sunaluunniit piniarnermut atorneqartussaaq nakersarneqarsimassaaq pitsaasuussallunilu.*

*Imm. 5.* Pisisseq atorlugu piniarnissamut Kalaallit Nunaanni imaluunniit Qallunaat Nunaanni taamatut misilitsinnermi angusisimasunut, pisisseq atorlugu akiliuteqarluni umimmanniarneq ingerlanneqarsinnaavoq.

*Imm. 6.* Pisissimut, qarsumut qarsullu naqquanut piumasaqaatit:

1) Pisisseq katitigaassaaq (nutaaliaasunik) pisisseq aaqqinneqarsinnaasumik umerfeqassaaq / nalunaaqqutaqassaaq 38 kg-nillu nusutsisinnaassuseqarluni.

2) Qarsui 0.75 m (kulstofpile).

3) Naqqui 8 g-mit, sisamanik saviusartallit.

**§ 12.** Umimmaap pisarineqartup neqaa tamaat pisaqarfimmiit nassarneqassaaq. Pisap sinneri sapinngisamik pisaqarfup qimalernerani nassarneqassapput imaluunniit tupeqarfiit, illuaqqat akiliuteqarluniluunniit aallaaniarnerup ingerlanneqarneranut akornusiinatik inissineqassallutik.

## Kapitali 7

### *Akiliuteqarluni aallaaniarnermi immikkut piumasaqaatit*

**§ 13.** Piniarnermut Naalakkersuisoq pisassiissutini piniarnissap aamma akiliuteqarluni aallaaniarnissap akornanni pisassiissutiniq agguassinissamut aalajangersaassaaq.

*Imm. 2.* Akiliuteqarluni aallaaniarnissamut pisassiissutigineqartut, umimmanniarnissamut pisassiissutinit tamarmiusunit tiguneqassapput, takuuk § 3, imm. 1.

*Imm. 3.* Naak § 4, imm. 2-mi aalajangersagaqaraluortoq, Piniarnermut Naalakkersuisoq akiliuteqarluni aallaaniarnermut ukioq kaajallallugu tigganniarnissamut piffissamik piniarfusussamik aalajangersaasinnaavoq.

*Imm. 4.* Arnavissamik piaqqamillu akiliuteqarluni aallaaniarneq piffissami 1. marts-miit - 31. julimut inerteqqutaavoq.

*Imm. 5.* Akiliuteqarluni aallaaniarnermi qoorortuut sullukinnersaat 7,62 x 63 kaliberiuvoq (aqerlup diameteria 7,62 mm) soorlu .30-06 aamma 308. Imassat nammineq qinerneqassapput.

*Imm. 6.* Pisisseq atorlugu piniarnissamut Kalaallit Nunaanni imaluunniit Qallunaat Nunaanni taamatut misilitsinnermi angusisimasunut, pisisseq atorlugu akiliuteqarluni umimmanniarneq ingerlanneqarsinnaavoq.

*Imm. 7.* Pisissimut, qarsumut qarsullu naqquanut piumasaqaatit:

1) Pisisseq katitigaassaaq (nutaaliaasunik) pisisseq aaqqinneqarsinnaasumik umerfeqassaaq / nalunaaqqutaqassaaq 38 kg-nillu nusutsisinnaassuseqarluni.

2) Qarsui 0.75 m (kulstofpile).

3) Naqqui 8 g-mit, sisamanik saviusartallit.

*Stk. 8.* § 21-imi aalajangersagaqaraluortoq akiliuteqarluni aallaaniarnermi umimmattat *PINIARNEQ*-mut nalunaarutigineqassapput. Akiliuteqarluni piniartitsinermik aaqqissuisut Aalisarnermut, Piniarnermut Nunalerinermullu Naalakkersuisoqarfimmut nalunaarusiortassapput. Tamatuma kingornatigut paasissutissat katersorlugit *PINIARNEQ*-mut nassiunneqassapput.

## Kapitali 8

### *Umimmanniarnermut atatillugu assartuutiniq atuineq*

**§ 14.** Umimmannik malersuinnermi unguisinnermilu assartuutit atorneqassanngillat, § 15-nili takuuk.

*Imm. 2.* Assartuutit taamaallaat atorneqarsinnaapput piniarfimmut piniarfimiillu assartuinnermut, aamma

assartuutunik ingerlaarnermut atatillugu umimmannut uumasunut minnerpaamik 500 meterinik ungasissusissaq malinneqassaaq.

*Imm. 3.* Umimmanniarnermi qimmit nassatareqqusaanngillat, taamaattoq imm. 4-5-mi pineqartut pineqanngillat.

*Imm. 4.* Allorniusami kangimukartup 44° W-mi avannamukartullu 66° N-mi qimmeqarfinni qimmussit assartuutitut atorneqarsinnaapput.

*Imm. 5.* Sumiiffimmi piniarfusumi qimmit qimuttut qimaannaqqusaanngillat. Qimmit qimataasut tiguneqarsinnaanngitsullu sapinngisamik ajornanngippat aallaneqassapput. Qimmip toqungasup timaa sumiiffimmi piniarfusumi qimaannarneqassanngilaq. Kingusinnerpaamik piniarnerup naammassinerata kingornatigut qimmit qimmeersiutaasut politiinut nalunaarutigineqassapput.

## Kapitali 9

### *Umimmannik unguineq*

**§ 15.** Piniarnermut Naalakkersuisoqarfik § 14, imm. 1-imik immikkut makkuninnga tunngaveqartunik akuersissuteqarsinnaavoq:

- 1) Allakkatigut qinnuteqaammik tigusaqarsimaneq,
- 2) Qinnuteqaat peqataasussat allattorsimaffiannik, kiisalu piffissaq aamma unguisinissap sumiiffissaa pillugu paasissutissanik imaqqassasoq,
- 3) Unguineq qamuteralaat, ATV imaluunniit qulimiguulik atorlugit ingerlanneqassasoq.

*Imm. 2.* Immikkut akuersissummi piumasaqaatinik nalunaarummik Piniarnermut Naalakkersuisoqarfup peqataasullu akornanni allatamik isumaqatigiissusiortoqassaaq.

*Imm. 3.* Umimmannik unguisinnaanermut immikkut akuersissut taamaallaat inunntu inuussutissarsiutigalugu piniarsinnaanermut allagartalinntu tunniunneqassaaq.

## Kapitali 10

### *Umimmammik pissatamik toqutsineq*

**§ 16.** Piniartuq pisussaavoq umimmaap eqqorneqarnermi kinguninnguagut toqusimanera qularnaassallugu.

*Imm. 2.* Piniarnermi umimmammik pissaasoq, umimmak pissatani sapinngisamik piaarnerpaamik toqussallugu pisussaavoq.

*Imm. 3.* Umimmak pissataq nanineqanngippat toqunneqaranilu, piniarnerup naammassineqarneranut atatillugu pissutsit piviusut pillugit, piniartup Piniarnermut Naalakkersuisoqarfik imaluunniit Piniarnermut Aallaaniarnermut Aalisarnermullu Nakkutilliisumut ilisimatissavaa.

*Imm. 4.* Umimmammik pissatamik sulilu uumasumik takunnittup allap sapinngisamik ajornanngippat umimmak toqussavaa. Pisarinninneq piffissap piniarfusup avataani pippat, umimmak summiffianut qimanneqassaaq. Pisarinnittup pisussaaffittut akisussaaffigaa, pisup qanoq ingerlasimanera pillugu Piniarnermut Naalakkersuisoqarfimmut imaluunniit Piniarnermut Aallaaniarnermut Aalisarnermullu Nakkutilliisumut nalunaarutigissavaa.

*Imm. 5.* Umimmak toqungasoo takusaaq takunniffimmut qimaannarneqassaaq.

## Kapitali 11

### *Uumatillugit tiguserit nuussinerillu*

§ 17. Piniarnermut Naalakkersuisoq akuersiteqqaarsimatinnagu umimmannik tiguserneq imaluunniit nuussineq kiisalu soriarsinnaajunaarlugit ungalusat iluiniititsinissaq inerteqqutaapput.

## Kapitali 12

### *Kommunimi ileqqoreqqusaq*

§ 18. Kommunimi ileqqoreqqusakkut kommunalbestyrelsi nalunaarut manna naapertorlugu, nalunaarummi maani aalajangersakkanik § 3, imm. 2-3-mit, § 4, imm. 2-3-mit aamma § 14, imm. 2-mit, sakkortunerusunik piumasaqaateqarsinnaavoq.

*Imm. 2.* Kommunimi ileqqoreqqusaq, Piniarnermut Naalakkersuisumit atulersinneqassaaq.

## Kapitali 13

### *Najukkami aqutsineq*

§ 19. Piniarneq pillugu Siunnersuisoqatigiinnik aamma kattuffinnik allanik attuumassuteqartunik tusarniaareernikkut Piniarnermut Naalakkersuisup, nunap immikkoortuinik killilikkanik ilivitsunik taakkuluunniit ilaanik aqutsinissamut agguuassisinnaavoq.

*Imm. 2.* Taakkununga piumasaqaatit allaganngorlugit Piniarnermut Naalakkersuisup imaluunniit Naalakkersuisumit tamatumunga toqqarneqarsimasumit aamma akuersissutiniq agguuassissusaatitaasunit atuuttunit isumaqatigissutigineqassapput.

## Kapitali 14

### *Pinngortitami uumassusilinnik misissuinermit nalunaaruteqartarneq*

§ 20. Pisanik nalunaaruteqarneq imaluunniit pisanut nalunaarsutiniq kommunimut tunniussineq piniarnerup naammassineqarnerata kingornatigut kingusinnerpaamik sapaatip akunneri-sa marluk qaangiunneranni pissaaq. Tamatuma kingornatigut paasissutissat ataatsimoortillugit piniarnerup naammassinerata kingornatigut kingusinnerpaamik sapaatip akunnerisa sisamat qaangiunneranni kommunimit Pinngortitaleriffimmut nassiunneqassapput.

*Imm. 2.* Pisanik nalunaaruteqarnermi immersuiffissiaq akuersissutip tunuaniittoq kingusinnerpaamik, pisap angallammut piniarnermut atatillugu assartuutaasumut ikineqarnerani immersorneqassaaq.

## Kapitali 15

### *Nujuartanik pisanik nalunaarutiginninneq*

§ 21. Umimmannik pisat aamma pissatat tamarmik, naak § 20-imi aalajangersagaqaraluartoq, *PINIARNEQ-mi* ukiumoortumik immersuiffissiami nalunaarutigineqassapput.

## Kapitali 16

### *Nakkutilliineq*

§ 22. Kinaluunniit politiinit imaluunniit piniarnermik aallaaniarnermillu nakkutilliisunit umimmanniarsinnaatitaanini uppersaqqullugu piumaffigineqaruni, akuersissut atuuttoq aamma

piniaernermut allagartaq atuuttoq takutissavai.

## **Kapitali 17**

### *Immikkut akuersissuteqartarnej*

**§ 23.** Siunertanut ilinniartitaanermik ilisimatusarnermillu siunertaqartunut nalunaarummi aalajangersakkat Piniarnermut Naalakkersuisoqarfimmit immikkut akuersissuteqarfigineqarsinnaapput, tassunga ilaalluni ilisimatusarnermut atatillugu umimmanniarsinnaanermut akuer-sineq.

**§ 24.** Umimmaat ulorianartorsiortitsisut imaluunniit angallannermut atatillugu annertuumik akornusersuisut qimaatinneqarsinnaanngippata toqunneqarsinnaapput.

*Imm. 2.* Imm. 1 naapertorlugu umimmaat toqunneqartut Namminersorlutik Oqartussanut pigisassanngortinneqassapput. Piniarnermut Naalakkersuisoqarfimmut piniaernerup ingerlasimanera nalunaarutigissallugu umimmannik pisaqarnermi akisussaasup pisussaaffigaa. Naalakkersuisoqarfiup umimmaap toqutap qanoq pineqarnissaa aalajangiiffigissavaa.

**§ 25.** § 6 imm. 4-mi aalajangersagaqaraluartoq aqutsinermi periaatsit aallaavigalugit piniaer-nermut allagartap 1. maj nallertinnagu akilernerqarsimanissaanik piumasaqaammit immikkut akuersissuteqartoqarsinnaavoq.

## **Kapitali 18**

### *Pineqaatissiissutit*

**§ 26.** Nalunaarummi matumani aalajangersakkanik unioqqutitsinermi akiliisitsineq pineqaa-tissiissutaasinnaavoq kiisalu sunngiffimmi aallaaniarsinnaanermut allagartaqarsinnaaneq imaluunniit inuussutissarsiutigalugu piniaernermut allagartaqarsinnaaneq arsaarinnissutaasinnaapput.

*Imm. 2.* Nalunaarummi malittarisassanik unioqqutitsinermi umimmannit pisarineqartunit isertitat Kalaallit Nunaanni pinerluttulerinermi inatsisini malittarisassatigut aalajangersakkat naapertorlugit arsaarinnissutigineqarsinnaapput.

*Imm. 3.* § 18 naapertorlugu, kommunimi ileqqoreqqusaliani kommunalbestyrelsi aalajangersaasinnaavoq, ileqqoreqqusaliani aalajangersakkanik unioqqutitsinerit akiliisitsinermik Kalaallit Nunaannilu pinerluttulerinermi inatsisini malittarisassatigut aalajangersakkat naapertorlugit arsaarinnittoqarsinnaavoq.

## **Kapitali 19**

### *Atuutilerfia il.il.*

**§ 27.** Nalunaarut manna atuutilerpoq ulloq 16. juli 2012.

*Imm. 2.* Peqatigitillugu Namminersornerullutik Oqartussat umimmaat piniagaanerat pillugu nalunaarutaat nr. 7, 8. februar 2001-imeersoq, Namminersornerullutik Oqartussat nalunaaru-taat nr. 24, 9. september 2002-meersoq umimmaat piniagaanerat pillugu nalunaarutip nr. 7, 8. februar 2001-imeersup allannguutaatigut allanngortinneqartoq aamma Namminersornerullutik Oqartussat umimmaat illersugaanerata pillugu nalunaarutaat nr. 9, 8. februar 2001-imeersoq atorunnaarsinneqarput.

*Kalaallit Nunaanni Namminersorlutik Oqartussat, ulloq 11. juli 2012*

Ane Hansen

/

Jens K. Lyberth

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut